



Sud Bosne i Hercegovine
Суд Босне и Херцеговине

Broj: S1 3 IŽ 029199 18 IŽ
Sarajevo, 07.08.2018. godine

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija, dr Branka Moraita, kao predsjednika vijeća, Dinke Bešlagić-Čovrk i Zvezdane Antonović, kao članova vijeća, odlučujući o žalbi Demokratske stranke Bosne i Hercegovine sa sjedištem u Sarajevu, ul. Mula Mustafe Bašeskije br. 3, izjavljenoj protiv odluke Centralne izborne komisije Bosne i Hercegovine, broj: 06-1-07-3-209/18 od 02.08.2018. godine, u nejavnoj sjednici održanoj dana 07.08.2018. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijena je ovjera kandidatske liste i kandidata političke stranke Demokratska stranka Bosne i Hercegovine (šifra 02323) Hajrudina Mulića, za učešće na Općim izborima 2018. godine koji će se održati 07.10.2018. godine, za izbor člana Predsjedništva Bosne i Hercegovine.

Žalitelj je blagovremeno uložio žalbu sa prijedlogom da Apelaciono odjeljenje Suda BiH uvaži žalbu i ukine pobijanu Odluku Centralne izborne komisije, te shodno tome naloži CIK BiH da ovjeri kandidatsku listu za izbor za člana Predsjedništva BiH za kandidata Mulić Hajrudina koji se izjašnjava kao Bosanac, te ubuduće omogući istom kandidatu i ostalim članovima te stranke da se kandiduju za izbor u Dom naroda Parlamentarne skupštine BiH koji se izjašnjavaju kao Bosanci ili drugačije, a ne kao pripadnici konstitutivnih naroda kao Bošnjaci, Hrvati i Srbi.

U žalbi ističe da osnov žalbe temelji na zauzetim stanovištima iz presude Evropskog suda za ljudska prava po podnesenoj aplikaciji Sejdić Dervo i Finci Jakob. Da su pobijanom odlukom grubo povrijeđena ustavna i temeljna biračka prava predmetnog kandidata a i ostalih koji se drugačije izjašnjavaju u odnosu na pripadnike konstitutivnih naroda kao Bošnjaci, Hrvati i Srbi.

Zbog navedenog bi po mišljenju žalitelja bila moguća direktna primjena međunarodnih dokumenata koje je ratifikovala država BiH kao članica

Ujedinjenih nacija i članica Vijeća Evrope u pogledu sprečavanja građana u ostvarivanju njihovih biračkih prava u pogledu kandidovanja i izbora na funkcije u zakonodavnu i izvršnu vlast u BiH, kada se ima u vidu posebno odredba člana 14 u vezi sa članom 6 stav 1 i 13 Evropske konvencije za zaštitu temeljnih ljudskih prava i sloboda i člana 1. Protokola br. 12 Evropske konvencije i kao i ostalih međunarodnih dokumenata.

Dat je odgovor na žalbu sa prijedlogom da se žalba odbije kao neosnovana.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluka Centralne izborne komisije Bosne kojom je odbijena ovjera kandidatske liste i kandidata političke stranke Demokratska stranka Bosne i Hercegovine (šifra 02323) Hajrudina Mulića, za učešće na Općim izborima 2018. godine koji će se održati 07.10.2018. godine, za izbor člana Predsjedništva Bosne i Hercegovine.

Prema odredbi člana 8.1 Izbornog zakona BiH za članove Predsjedništva BiH koji se neposredno biraju sa teritorije Federacije BiH birači upisani u Centralni birački spisak biraju jednog Bošnjaka i jednog Hrvata, što je u skladu sa odredbom člana V Ustava BiH da se Predsjedništvo BiH sastoji od tri člana: jednog Bošnjaka i jednog Hrvata koji se svaki biraju sa teritorije Federacije i jednog Srbina koji se bira neposredno sa teritorije Republike Srpske. Znači članovi Predsjedništva biraju se neposredno u svakom entitetu u skladu sa Izbornim zakonom.

Dakle, žalbom se ukazuje da bi Apelaciono odjeljenje Suda BiH trebalo uvažiti predmetnu žalbu i obavezati CIK BiH da ubuduće omogući žalitelju i ostalim kandidatima da se kandiduju za člana Predsjedništva BiH i da im se omogući izbor u Dom naroda PSBiH, i to za one koji se izjašnjavaju kao Bosanci ili pak drugačije, a ne kao pripadnici konstitutivnih naroda (Bošnjaci, Hrvati i Srbi). Sve naprijed navedeno Sud BiH bi trebao učiniti na osnovu direktne primjene međunarodnih dokumenata iz oblasti ljudskih prava i u skladu sa judikatima Evropskog suda za ljudska prava, kojima je utvrđena diskriminacija i povreda biračkog prava aplikantima usljed nemogućnosti kandidovanja za člana Predsjedništva BiH i kandidovanje i izbor za Dom naroda PSBiH. S obzirom na navode žalitelja očigledno je da on traži da Sud BiH ostavi neprimijenjenim određene odredbe Izbornog zakona BiH iz razloga što nisu usklađene sa Evropskom konvencijom i njenim protokolima. Prije svega, Sud BiH mora utvrditi ima li nadležnost da ostavi neprimijenjenim odredbe nacionalnog Izbornog zakona BiH u ovoj pravnoj stvari, jer nisu usklađene sa međunarodnopravnim aktom - Evropskom konvencijom. U tom smislu, Sud BiH ukazuje da su standardi iz odredbe člana 8.1 Izbornog zakona BiH direktna posljedica ustavnih odredaba člana IV. stav 1. i člana V Ustava BiH. U tom smislu nesporno je da je zakonodavac prilikom donošenja Izbornog zakona BiH, propisao odredbe koje su u skladu sa Ustavom BiH, kao aktom nesporedno hijerarhijski nadređenom predmetnom Zakonu. Prema tome, na osnovu naprijed navedenog, a imajući u vidu da ingerencije Suda BiH obuhvataju djelokrug primjene nacionalnog prava,

potpuno je neosnovan navod da bi Sud BiH trebao direktno primjenjivati međunarodne pravne standarde pritom derogirajući nacionalni pravni okvir. Dodatno, ovo iz razloga, što je i Ustavni sud BiH u predmetu broj U 5/04, utvrdio da prava iz Evropske konvencije ne mogu imati superiorniji status u odnosu na Ustav Bosne i Hercegovine, jer je Evropska konvencija kao međunarodni dokument stupila na snagu na temelju Ustava Bosne i Hercegovine, te ustavne nadležnosti proističu iz Ustava Bosne i Hercegovine, a ne iz Evropske konvencije. Ustavni sud zaključuje da se uvijek mora držati teksta Ustava Bosne i Hercegovine, koji ne dozvoljava širu interpretaciju nadležnosti, s obzirom na obavezu Ustavnog suda da "podržava ovaj Ustav".

Tumačenjem prakse Ustavnog suda BiH, Sud BiH zaključuje da su nadležnosti Suda BiH u domenu primjene nacionalnog pravnog okvira, bez mogućnosti ad hoc sudskog inkorporisanja međunarodnopravnih standarda suprotnih zakonskom tekstu Izbornog zakona BiH. Naime, osnovni demokratski postulat funkcionisanja vlasti u pravnoj državi je princip kontrole i ravnoteže (check and balance). Ukoliko bi Sud BiH ostavio neprimijenjenim standarde Ustava BiH i Izbornog zakona BiH, neosnovano bi preuzeo ovlaštenja zakonodavne (čak i ustavotvorne) vlasti, i time bi narušio temelje funkcionisanja demokratske vlasti.

Zbog navedenog ne može se prihvatiti tvrdnja žalitelja da je grubo diskriminisan kandidat Hajrudin Mulić i da su mu na taj način povrijeđena ustavna i temeljna biračka prava.

S obzirom da je kandidat Mulić Hajrudin na obrascu izjave o prihvatanju kandidature izjasnio kao „bosanac“, Centralna izborna komisija je pravilno postupila kada je u skladu sa odredbom člana 4.21 stav 2 Izbornog zakona BiH obavjestila žalitelja da u roku od 5 dana otkloni nepravilnost na kandidatskoj listi. Kako navedene nepravilnosti nisu otklonjene jer je navedeni kandidat ostao kod svog ranijeg izjašnjenja, to je pobijana odluka CIK BiH zasnovana na potpuno i pravilno utvrđenom činjeničnom stanju i pravilnoj primjeni materijalnog prava.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A
dr Branko Morait